

Petisaun

Na'in ulun Prezidente no Membro Parlamento Nasional ne'ebé ami respeitu.

Ami nudar membru sosiedade sivil, ne'ebé hakru'uk no hamulak ba konstituisaun Repúblika Demokratika Timor-Leste ne'ebé hatete iha **artigu 48** katak sidadaun baibain hotu-hotu iha direitu atu hato'o petisaun, keixa, no reklamasan individual ka kolektivu ba órgaun soberania Estadu nian, hodi defende nia direitu, buat ne'ebé hakerek iha konstituisaun, iha ukun ka defende interese jeral, husu bo'ot ba Na'in Ulun sira hodi sani netik ami nia hanoin kona ba debate iha spesialidade, liu-liu dait ba proposta atu hari **industria oli pezada ba produsaun eletridade ne'e**.

Hatetu hikas ho klean ba:

1. Obrigasaun konstitusional ba nai kaer ukun sira, liu-liu iha **Artigu 6** liña f, Estadu nia objetivu mak atu proteje meu ambiente no tau matan ba rikusoin natural;
2. **Artigu 61** pontu 1, katak povu hotu iha direitu atu moris iha meu ambiente ida ne'ebé saudavel no ekolojikamente ekilibradu. Nune mos ba **Artigu 61** pontu 2, kona ba dever sidadaun hotu no Estadu atu valoriza rikusoin ne'e.
3. **Artigu 61** pontu 3, katak, Estadu tenke loke dalan ba atividade ne'ebé defende ambiente hodi fó garantia ba dezvoltamentu sustentável;
4. Tuir lei subsidiária, wainhira Timor-Leste seidak iha rasik lei ruma, mak bele utiliza lei rejime anterior. Ba projektu bo'ot hanesan industria oli pezada, tuir Lei AMDAL No 23 (1997) katak presija halo Estudu Impaktu Ambientál ida molok projektu ne'e hahu, inklui prosedimentu atu hili makina (Jerador) nebe sei utiliza (Laos sosa uluk tiha makina ka jerador mak halo Estudu Impaktu Ambiental).
5. Promesa husi Representante Povu sira ne'ebe ohin lora tur iha uma fukun ne'e, iha tempu kampaña eleitoral, katak, ***"wainhira kaer ukun, sei promove desenvolvimento sustentavel no halo protesau ba meio-ambiente"***. Proposta industria oli pezada ne'e nudar exame konsiensia politika ba promesa nebe nai ulun sira halo ona.
6. Adesaun Timor-Leste ba *United Nation Framework Convention on Climate Change (UNFCCC)*, *United Nation Convention on Biodiversity (UNCBD)*, *United Nation Convention on Combating Desertification (UNCCD)* no Protokolo Kyoto, nebe hatur prinsipio ba *Clean Development Mechanism (CDM)* no oportunidade ba Timor-Leste atu hetan apoio, teknologia, informasaun, finanseiro no tekniku husi *Global Environmental Facility (GEF)*.
7. Referensia pratika iha rai barak mak hatudu katak ohin lora sira husik ona teknologia industria oli pezada ne'e ba sistema energia foun ne'ebe la fo impaktu bo'ot ba meu ambiente.
8. Timor-Leste sei hetan disaster bo'ot (ba meu ambiente, saude humano, no ekonomku) iha futuru wainhira adopta sistema industria oli pezada ne'e.

Exijencia no Sujestaun:

Baseia ba pontu hirak ne'ebe tetu ona iha leten nomos konsiensia fraternidade no responsabilidadi atu tau lisuk hanoin ba salva guarda nasaun ne'e, mak ami mai ho hakraikan, ba **Sua Exelencia Presidente no Membro Parlamento husi Bankada hotu-hotu, katak:**

1. Desijaun politika ba aprovasaun projektu industria oli pezada ne'e iha **implikasaun responsabilidadi legal** nebe todan tebes, tamba impaktu multidimensional nebe sei mosu husi atividadi ne'e. Publiku ne'ebe hetan impaktu ba saude ka meiu ambiente (tuir artigu 61 Konstitusaun RDTL no Lei seluk nebe vigora iha Timor-Leste) mak sei halo proklamasan legal (*class action*) hasoru entidade nebe halo desijaun politika nebe afeita sira nia moris ka sira nia ambiente;
2. Desijaun politika ba aprovasaun projektu oli pezada ne'e iha kontradisaun bo'ot ba prosesu nebe halao tiha ona husi premeiro Governo to'o Governo aktual ba promosaun energia renovavel. Desijaun ne'e mos iha kontradisaun ho prinsipio Clean development Mechanism nebe bele taka dalan ba Estado Timor-Leste hodi hetan apoio husi *Global Environmental Facility* (GEF).
3. Desijaun ba aprovasaun projektu oli pezada ne'e mos sei hasae tan deit valor orsamentu Estadu no obriga Parlamentu Nasional atu halo desijaun ba foti osan liu prosent 3 nebe vigora ona iha Lei Fundu Petrolio nebe aprova ona iha uma fukun ne'e tinan hirak liu ba. Desijaun ne'e mos hamosu presedente negativu iha futuru ba forsa parlamentu sira atu foti fundus petrolio ne'e bo'ot liu tan no la tuir prinsipio desenvolvimentu sustentavel.
4. Orsamentu projektu oli pezada ne'e bo'ot tebes no sei afeita sistema orsamentu tinan-tinan (iha tinan ne'e 87.000.000 USD, tinan 2010 sei sa'e to'o ka liu 160.000.000 USD no 2011 ka 2012 sei aumenta tan). Total investimentu inisial ba industria oli pezada ne'e to'o osan 360.000.000 USD. Makina tuan ona (ujadu tinan 20 ona), malnutensaun karun, teknikamente rekursu humano ba jere sistema ne'e seidauk iha no kusta ba rekuperasaun ambiental nebe sei karun tebes, mak diak liu, **Exelentissimo Membro Parlamento** sira hare atu aloka hikas fali rekursu finanseiro ne'ebe iha ba necesidadi basiku seluk, hanesan hadia sistema transportasaun publiku ne'ebe ohin loron karun no seidauk diak, eskola sira ne'ebe seidauk iha kondisaun apropriadu, tratamentu saniamentu ambiental ne'ebe seidauk diak, be mos no necesidade importante seluk tan, inklui hametin politika energia renonavel iha Timor-Leste.

Maktaka

Libertasaun Povu nebe absoluta no kompletu katak ita sei la husik hela veneno no tusan ba futuru jersaun sira.

Timor-Leste ohin loron nudar tusan ba jersaun loron oin mai. Desijaun politika ne'ebe sei halo presija hatur iha prinsipio ida ne'e nudar base ba desenvolvimentu sustentavel.

Organizasaun ne'ebe haklaken hamutuk:

Dili, 21 Janeiro 2009

Haburas
La'o Hamutuk
FONGTIL
HASATIL